

Namminersornerup eqqunneqarnera pillugu Josef Motzfeldtip oqalugiaataa

Oqaaserineqartut atuupput.

Ataqqinartorsuaq,
Kunngikkormiutut ataqqinassusillit
Hr. Statsminister
Hr. Folketingip siulittaasua
Inatsisartut
Naalakkersuisut
Ataqqinartut qaaqqusat
Arnat Angutillu

Namminersornerup eqqunneqarnerata nalliuttorsiutigineqarluni persuarsitigineqarnerani qaaqqusat peqataasusi tamassi inuiaat kalaallit, Inatsisartut Naalakkersuisullu sinnerlugit qamanna pisumik qutsavigaassi. Aammattaaq Namminersorneq pillugu Isumalioqatigiissitaasimasoq danskillu naalakkersuisui sulinerannut suleqatigiinnerannullu ullumikkut saqqummiunneqartumut qutsavigaakka.

Oqaluttuarisaanikkut, aningaasarsiornikkut inooqatigiinnikkullu sorlaat qajannaatsut ukiuni 300-ni ataatsimut Danmarkilu oqaluttuarisaanitsinnut tunngaviupput. Aammattaaq ilaqutaariissutsikkut ikinngutiginnikkullu immitsinnut pituttorsimavugut.

Kunngikkormiut kalaallinut inuiannut kissalaartumik misigissuseqarput tamannalu takutinneqakulavoq, kalaallillu aamma Kunngikkormiunut taamatorluinnaq misigissuseqarput. Kunngikkormiut Kalaallit Nunaannut tikeraaraangata nuannaarutaajuannarpoq. Namminersorneq Naalagaaffeqatigiinnermi killissarititaasut aallaavigalugit ineriartortussaavoq. Sinaakkusiussat tamakku Namminersorneq pillugu inatsiseqalernitsigut maanna annertusineqarput, tamannalu kalaallinit sivisuumik kissaataasimavoq.

Namminersornerulluni Oqartussaanerup eqqunneqarneranit Kalaallit Nunaata siunnerfissani aallarfigimmaguli ukiut 30-t maanna qaangiupput. Ingerlaarnermi angallatip minittorneranik malitassaqaqqanngilaq, Qaasuitsup qilaani ulloriaqanngilaq sammivissamik nalerarisinnaasatsinnik, inuiaqatigiittut siunnerfimmuut nalusatsinnut periarfissanik, navianartunik akisussaaffimmillu useqarluta Namminersorneruneq pillugu Inatsisip tunniussaatioqorluta taamanikkut ingerlasussanngorpugut.

Namminersornerulluni Oqartussaanerup kalaallit inuiaat ineriartippai Kalaallit Nunaata ineriartorneranut ataatsimoorlutik akisussaaffimmik isumannaarisussanngortillugit. Ullormilu uani oqaluttuarisaanermi inissittussami nuannaarfiusumilu Namminersornerulluni Oqartussaanerup ingerlanerani naammassillugit angusarisimasat ataatsimoorluta tamatta nuannaarutigalugit usorsisimaarutigalugillu kingumut qiviarsinnaavagut.

Ullut nalorninartullit aamma nalaattarsimavavut. Namminersornerulluni oqartussaanerup nalaani ukiut ingerlaneranni Kalaallit Nunaanni inuiaqatigiit inuttaasullu ataasiakkaarlutik nalaassimasaat erloqinernik artornartorsiorfiusunillu nalaattaqarfiunngitsoortarsimangillat.

Taamaattoq namminiulluta ingerlaqqinnissamut sumullu sammiveqarnissamik periarfissiisutiginneqartukkut inuiattut ataatsimoorluta tiguartisimanermik ilisarnaateqartumik ammaanepqarpugullusooq atugarissaarnikkut piorsarsimassutsikkullu annertusaanissatsinnut.

Namminersornerulluni Oqartussaanerup piorsarsimassutsikkut kingornussatsinnik, oqaatsitsinnik aamma oqaluttuarisaanitsinnik misigisimanerput nukittorsarsimavaa ullumikkut uummarilluni naasutut kusanassuseqalersillugu.

Ataqqinartorsuaq, ukiut 30-t matuma siora 1979-imi maajip aallaqqaataani Namminersorneruneg pillugu Inatsit inuiannut kalaallinut tunniukkakku, oqalugiaatinni tassunga attuumassutillit arlallit oqaatigaatit. Ataqqinartorsuaq, ilaatigut oqarputit; nuna inatsisinik tunngaveqarluni ingerlanneqassaaq.

Oqariaaseq taanna qangarsuarli ilumoortoq aamma Namminersornerulluni Oqartussaanerup ineriartornerani tunngaviusimavoq. Taamatutaaq Namminersorneruq pillugu Inatsit inatsisitigut tunngaviusaaq, taannalu inuiattut meeqqatta siunissaata tunngavissiornerani nalerarissavarput.

Innuttaasut taasisinneqarnerisigut inuiaqatigiit kalaallit Namminersorneruq pillugu Inatsit akueraat, innuttaasut amerlanerussuteqarluartut inatsimmik akuersineratigut. Taamaasilluni Namminersorneruq nalliuttorsiuutigisarput inuiaat kalaallit namminneq inuunertik pillugu takorluugaannut kissaatigisaannullu, nunallu siunissaanut ilisarnaataalerpoq

Namminersorneruq pillugu Inatsisikkut pingaarutilinnik arlalinnik angusaqarpugut, ilaatigut inuiattut, oqaatsitsinnik piorsarsimassutsitsinnillu tamanit akuerineqarpugut akuerineqarpugut, aamma nammineq nunatsinnik piginnittuunerput naqissuserneqarpoq, tamannalu ukiut ingerlanerini Kalaallit Nunaata aningaasarsiornikkut imminut napatilerneranut tunngaviusussanut ilaassaaq.

Namminersornermi periarfissaasut isumalluutaasullu timitalerniarneranni inuttut aningaasarsiornikkullu sapiissuseqarneq, nakkaannajuissuseq minnerunngitsumillu ataatsimoorneq piumassuseqarfignisariaqarput. Inuiaat kalaallit suliaasaq tamanna isumagissallugu nammassinnissinnaammata qularutiginnilara.

Kalaallit Nunaata oqaluttuassartaani immikkoortoq Namminersornerulersimaneq naammassigaluttuarparput, siunissallu ilusissaa aanngasissaq erseriatulerpoq. Taamaattoq inatsisit aamma sutut pisussaannartut aalajangiinerit Namminersornermi kisimik pineqanngillat, aamma pineqarput takorluukkanik ilusiliinissamut piumassuseqarneq siunissamillu nutaamik pitsaanagerusumillu eqqarsaatnik pilersitsisinnaanermut piumassuseqarneq.

Namminersornerup nalaani takorluukkavut anguniakkavullu tassaasariaqarput inuiaqatigiit kikkunnilluunniit atorfissaqartitsisut, amma kikkulluunniit piginnaanerminnik timitaliiniarneranni periarfissaqartitsisut. Piumassuseqarluta nukittussuseqarlutalu tamakkiullugit pilersissavagut inuiaqatigiit, innuttaasut ataasiakkaat tamarmiunermik innutaaqatiminnillu peqateqarnermik pisinnaatitaaffimminnik pisussaaffimminillu avitseqatigiiffiusut.

Inuiaqatigiit kalaallit suli aningaasarsiornikkut piorsarsimassutsikkullu ineriartornerisigut annertunerusumik aningaasarsiornikkut naalakkersuinikkullu nammineernerulernissaat Namminersornermi anguniagassat ilagaat. Ilinniartitaanikkut namminersornerullu ingerlanerani aalajangiisartunik ataavartumik innuttaasut isummersoqateqartarnerisigut anguniagaq tamanna piffissap ingerlanerani piviusunngortinneqassaaq. Isummersoqatigiinnerit aalajangiisarnerillu tamanut ammasuussapput, taamaalilluni innuttaasut siunissamik ataatsimoorussamik pilersitsinissamut peqataassammata.

Kalaallit Nunaat asasara asasakka nunaqqatikka, Namminersorneruq pillugu qamannga pisumik pilluaritsi. Ulloq tassaavoq oqaluttuarisaanermi alloriarfik nutaaq. Ukiuni nutaani tamatta sulineq, suleqatigiinneq nangissagipput pisariaqartinneqarpoq - arnaagutta angutaagutta, inuusuttuugutta utoqqaaguttaluunniit. Kisimiilluta artorsarutta ataatsimoorussarput pisariaqarpoq.

Anorersuit nalaattarumaarpavut, qaqqat qutaarluusut qarsunniartarumaarpavut ilaatigullu sikuliaq avalaffigisariaqartarumaarparput.

Immitsinnut uppernarsaaqatigiinniarta sulerulunnerujumalluta. Assavut immitsinnut isaatsigit isumassuinissamillu neriorsoqatigiilluta - immitsinnuinnaangitsoq ikioqatigiillutali isumassoqatigiikkumalluta.

Nunarsuarmioqataasutut siunissami nunarsuarput najoruminarnerusoq anguniassavarput. Piffissami aggersumi ataatsimooqatigiinnerunissaq aporaannermit pisariaqarneruvoq.

Siunissaq periarfissarpassuarnik ulikkaarpoq. Periarfissanit sunik pissarsinissatsinnut nutaaliorinnaassuserput, periarfissarsiullaqqissuserput, sapiissuserput kajumissuserpullu apeqqutaaginnaarpoq.

Inuit pisinnaatitaaffiisa, eqqissinerup, sillimaniarnerup ineriartorerullu nanginnissaasa isumannaarneqarnissaannut Namminersornermi peqataassaagut.

Inoqatitsinnut ataqqinninneq, uppernassuseq, assigiinngisitaarnerup akuersaarneqarnera, piuumassuseq, nutaamik eqqarsarnissamut sapiissuseqarneq aamma tamat isiginiarlugit eqqarsariaaseqarneq Namminersornermi pingaartinneqassapput.

Namminersornermi inooqataasut tassaapput kalaallit inuiaqatigiit oqaatsitsigit piorsarsimassutsikullu nunanit tamanit akuerisaasut. Tamanna nukittorsarneqassaaq ersarissarneqarluni, taamaalilluni taamatut akuerineqarneq inuianni imminut tatiginermik pilersitsilluni nunarsuarmioqataasunit akuerineqarnermik kinguneqassammat.

Akaarinninneq sanngeequtaanngimmat akaarinninnginerlu nukittoqutaanngimmat aalajangiusimassavarput.

Namminersornikkut takorluukkavut pivisunngortissavavut ataatsimoortumillu ineriartorneq nangillugu, taamaasilluta suliaassavut utaqqisut naammassisinnaajumallugit. Kalaallit Nunaata innuttaasalu inuiattut ilakkuminartutut ilisarnaateqarnerat innuttaasullu unammilligassanik allanngorartunik ataatsimoortunillu aaqqissuussinissamut piuumassuseqarnerat suliarissavarput.

Inuiaqatigiuvugut isertuaatsumik ilasseraartut. Taama kinaassuseqarnerput nangissavarput. Kikkut tamarmik suminngaanniilluunniit kingoqqisuugaluarpata ataatsimut ajunnginnerpaaq anguniarlugu ilaalersinneqarsinnaalernissaannut kalaallinnullu inuiaqatigiinnut akulerutsinneqarsinnaanissaannut pitsaasumik sinaakkusersuissaagut.

Isumannaassavarput Kalaallit Nunaanni, nunatsinni, naapitassajuassasoq inooriaaseq qaqugumulluunniit takussutissiisoq inuup nakkaannajuissusaanut, nukittussusaanut aamma kusanassusaanut.

Naggasiullugu tamassi inuiattut ullorsiorluarnissassinik kissaappassi qinnuigaassilu peqatigalunga Namminersorneq pillugu pingasoriarluta horaarutigissagipput. Namminersorneq pillugu "Hurra" "Hurra" "Hurra".